



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno MCLXXXI. ad annum MCCCXIV.

Parisiis, 1644

Epistola XI. Caelestini Papae III. Ad Simonem Decanvm Eboracensem. De
administratione eiusdem dioecesis.

urn:nbn:de:hbz:466:1-15974

studuerint, de indulto nobis a Domino auctoritatis officio illam remissionem impositæ pœnitentiæ per sacerdotale ministerium facimus, quam prædecessores nostri suis noscuntur temporibus statuisse: vt videlicet qui corde contrito & humiliato spiritu laborem huius peregrinationis assumpserint, & in pœnitentiam peccatorum hoc iter expedierint, si in fide decesserint, plenam suorum criminum indulgentiam, & vitam consequentur æternam. Bona quoque ipsorum, ex quo crucem acceperint, cum familiis suis sub Romanæ ecclesiæ, nec non & archiepiscoporum, aliorumque ecclesiæ prælatorum protectione consistant, & nullam de his, quæ in susceptione crucis quiete possederunt, (donec de ipsorum reditu vel obitu, certissime cognoscatur) iacturam vel perturbationem sustineant vel quæstionem, sed bona ipsorum integra remaneant interim & quæta.

Illi autem qui in subsidium terræ illius de bonis suis illuc transmiserint de peccatis suis veniam consequentur, iuxta moderamina prælatorum. Hunc tibi, frater archiepiscope, oneris huius laborem duximus iniungendum, mandantes, vt apud carissimum in Christo filium nostrum illustrem Anglorum regem, qui terram sanctam sub trium statuit treguis annorum, vt ad defensionem illius terræ milites & pedites bene instructos transmittat, assiduis exhortationibus elaboret: prouinciam circumiens Anglicanam, opportunis & importunis prædicationibus instet, vt pro defensione Christianitatis assumpto crucis signaculo, terram visitent transmarinam.

EPISTOLA XI.

CÆLESTINI PAPÆ III.

AD SIMONEM DECANVM EBORACENSEM.

De administratione eiusdem diœcesis.

*Cælestinus episcopus seruus seruorum Dei dilecto filio Simoni
decano Eboracensi salutem & apostolicam
benedictionem.*

CVM vniuersalis ecclesiæ regimen nobis licet insufficientibus diuina fauente gratia sit commissum, & sin-

gularum ex eis casibus præcauere teneamur & vtilitibus prouidere, illud nobis est summo opere præcauendum, ne inde ecclesiæ in temporalibus vel spiritualibus detrimentum incurrant, vnde ipsarum honorem & commodum credimus procurare. Cum enim pensatis personarum meritis, & diligenter inspectis, aliquis iuxta suorum exigentiam meritorum per nos fuerit suæ dignitatis potestate suspensus, & ab ecclesiarum prælatione ad tempus amotus, ne subditis pastoris cura priuatis malignandi materia tribuatur & occasio litigandi, eis in tali debemus prouidere persona, quæ & litigantium dirimere quæstiones, & subditorum excessus corrigere nouerit; & quantum sui officii debitum patitur, & diligit, & affectet. Inde est, quod cum Eboracensis archiepiscopus, eius actibus exigentibus, & contumacia faciente, qui abusus patientia nostra, neque a suis iniquitatibus destitit, nec nostro se conspectui, indulto sibi misericorditer termino, præsentauit, ab vsu pallii, & episcopalis officii executione, a ministracione quoque tam spiritualium quam temporalium, & beneficiorum perceptione nostra sit auctoritate suspensus; discretioni tuæ auctoritate præsentium duximus indulgendum, vt cum consilio canonicorum in Eboracensi ecclesia residentium clericorum Eboracensis diocesis excessus corrigere valeas; & querelantium tam clericorum quam laicorum Eboracensis diocesis controuersias, quæ iudicio exigunt ecclesiastico terminari, canonicè definire, canonica seueritate, appellatione remota, percellens eum qui super hoc contumaciter duxerit resistendum, donec eidem ecclesiæ aliter fuerit sollicitudine nostra prouisum. Nulli ergo omnino hominum liceat hanc paginam nostræ concessions infringere, vel ei ausu temerario contraire: si quis autem hoc attentare præsumpserit, indignationem omnipotentis Dei & beatorum Petri & Pauli apostolorum eius se nouerit incursum.

Datum Laterani decimo Kalendas Ianuarii, pontificatus nostri anno quinto.

EPI-